


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-61	As-Shaff	14	2	Madaniyyah	Ke-109	6



Zaman Diturunkan

Surah as-Shaff besar sekali kemungkinannya diturunkan pada tahun ke-3 Hijrah selepas orang-orang Islam mengalami kekalahan sementara dalam peperangan Uhud yang berlaku pada bulan Syawwaal tahun ke-3 Hijrah. Ketika itu orang-orang yang baru memeluk agama Islam dan orang-orang munafiq secara khususnya perlu sekali diberikan pengajaran dan asuhan supaya mereka tetap pendirian dalam jihad, ta'at kepada ketua dan bersepakat serta berdisiplin.

Perkaitan Surah As-Shaff Dengan Surah Sebelum Dan Selepasnya

Di dalam Surah al-Mujaadalah, al-Hasyr dan al-Mumtahanah telahpun disebutkan secara terperinci aktiviti-aktiviti orang-orang munafiq, di dalam Surah as-Shaff ini pula mereka diseru supaya tidak menjadi jaguh bual, sebaliknya menjadi jaguh dalam perjuangan membela agama Allah dengan penuh keikhlasan, mereka diseru supaya menjadi **أَنْصَارُ اللَّهِ**. Selain diberikan berita gembira tentang kemenangan Islam, diceritakan juga tentang beberapa petua dan tips untuk mengalahkan musuh-musuh dari luar.

Beberapa Kata Kunci Dan Tema Utama Surah

1. Perkataan **إِظْهَار** dengan maksud kemenangan agama Islam disebutkan sebanyak 2 kali di dalam surah ini (Ayat: 9 dan 14).
2. Alif lam yang terdapat pada perkataan **الدِّينِ** surah ini adalah untuk menyatakan jenis, perkataan **دِين** dalam Bahasa Arab boleh bererti kekuasaan, undang-undang, balasan baik dan balasan buruk dan lain-lain. Perkataan **الدِّينِ** di sini dipakai dengan erti kekuasaan, ia merangkumi semua jenis kekuasaan. Firman Allah **لِيُظْهِرَهُ عَلَى الدِّينِ كُلِّهِ** bererti untuk Allah nyatakan Islam mengatasi semua jenis kekuasaan yang lain (Ayat: 9).